

四庫全書

集部

欽定四庫全書

華陽集卷二十一

宋 王珪 撰

制詞 詔

賜使相判鄆州曹佾赴闕詔

勅卿承累世之貴出外家之賢自奉寄於藩符且薦更
於歲筦長樂之愛豈無弟兄之懷況元舅之歸是亦文
武之憲宜膺迅召式竚嘉猷詔到日卿可交割職分公
事與轉運使或提點刑獄兼權管勾訖發來赴闕

賜宣徽北院使知鄆州曹佺到任謝恩進馬詔
勅卿地聯中姻心嘉外剝留半符於上國擁六纛於東
藩初布治條遽馳貢禮載惟傾鄉靡忘嘆嘉

賜翰林侍讀學士知汝州劉敞賀登寶位進馬
詔

勅朕誕膺靈命首發慶條有嘉禁從之虔爰飭上馳之
貢省章知順仄席不忘

賜安武軍節度使宣徽南院使程戡赴闕茶藥

詔

勅卿內均政倚外撫邊衝適擁節以遄歸正涉春之餘
凜載念長途之驚豈無彌日之勞宜被寵頒用資珍輔

賜端明殿學士知河南府王拱辰免恩命不允
詔

勅卿夙揚瓌望徧履顯途比勞西戍之師宜主別都之
齎大用猶屈至懷益冲維洛邑天下之中秋官文昌之
貴蓋地重則君倚異秩峻則民瞻崇屬在兼材亶亡間

論方賴保釐之舊豈煩悃悞之陳往安而居當體予遇所乞宜不允

賜判河南府文彥博乞罷使相第一表不允詔
勅乃孟夏壬寅以成德之節左揆之章命爾以太原之
行朕惟卿有奉親之難故改釐西都又聽以還加秩之
拜猶俯而未安也願得舊鎮以領之吁何其辭避之至
也夫爵祿者天下之砥石誠所以礪世也朕於卿惟恐
弗及焉所乞宜不允

賜文彥博乞罷使相第二表不允詔

勅卿早負大名嘗更重任自罹憂之去位逮終制以還
朝儀形未親寤寐如渴奚再形於封奏欲過避於寵榮
矧文武之舊臣有忠孝之高節往祇茂冊入告嘉猷所
乞宜不允

賜判延州程戡乞退不允詔

勅卿頃在先朝嘗更二府自出守於邊寄顧薦易於年
陰而賊態靡常寢生狂忽之患方隅多士久藉鎮綏之

謀迺於此時欲去其位雖亮昔陳之惘且非素貯之懷
所乞宜不允

賜檢校太尉兼侍中曹佺免恩命第二劄子不
允詔

勅朕纂祖之休顧義為天下重繩民以化知孝於人道
先故懽然有恩以交乎中必渙然有文以施乎外每懷
慈壽不報之德且旌武惠多賢之祥適告大廷之書而
有僚之聽靡不合非假三牲之養而四海之風何以形

維是定謀良難固避所辭宜不允

賜宣徽北院使保靜軍節度使曹佾乞邊任不

允詔

勅夫祿元勲者必褒其後託外戚者必榮其家積有通
規亶亡過寵卿履高華之序抗忠義之懷屢形囊封願
試邊瑣然矜功名者誠昔人所慕蓋保富貴者亦當時
所難矧屬邦國之熙曾無疆事之警宜留密侍益導嘉
猷雖高乃誠莫徇茲舉所乞宜不允

賜保平軍節度使同中書門下平章事判鄆州
曹佺免恩命不允詔

勅朕夙承慈訓祇適丕圖有懷外戚之良矧出元勲之
裔名秩未稱予心慙然適登命於台司尚倚綏於東土
忽覩需奏蘄避寵章蓋叶僉謀所宜欽受所乞宜不允
賜外任臣僚王拱辰等賀寶位進馬詔

勅卿早分邦寄具師朝彝肆予蒞祚之初爰有旅廷之
貢載循順節昌弭褒懷

賜使相判許州張昇乞致仕第一表不允詔

勅卿向秉政幾屢辭顯重自均藩寄甫便燕私奚為上
牘之來重有遺榮之舉且陳諸止足雖慕昔賢之高然
稽之典型孰如元老之輔勉綏吉履終憲惇言所乞宜
不允

賜張昇乞致仕第二表不允詔

勅卿早以碩望列於輔臣比睠年德之高聽解樞機之
務既優以陪藩之寄又寵以台鉞之行歲月未逾封章

疊至況庭亡滯訟足資卧閣之閒而地在故鄉不為衣錦之樂高情雖至舊政寧忘所乞宜不允

賜張昇乞致仕第三表不允詔

勅卿孤風少附耆德益明自辭柄府之勤適就陪藩之佚徒念山川之間每極思賢之懷顧日月未逾奚為謝事之請雖屢形於指諭靡具體於睠求誰如將相之榮更游於故里終及京師之福以望於老成申繹舊勞難諭嘉退所乞宜不允

賜張昇乞致仕第四表不允詔

勅夫經遠務者須舊德濟大忠者忽細圖眷言黃髮之
良方就朱轡之逸謝權鈞軸況與俗之自高請老邱園
猶上書之不已雖迹風懷之厲頗申指諭之煩似未深
體國之思何不滿對時之望往即安服居毋費辭所乞
宜不允

賜樞密使張昇乞致仕第一表不允詔

勅朕觀前代求治之主固有屈已以就詢黃髮之言矧

舊惟共政之臣年耆而德茂此朕朝以丐所告而夕以圖所補也卿進更柄府勤勞五年迺自春以來引疾杜門介然有歸老之請朕念卿忠瘁之深形於顏色雖欲嘉遂高冲顧不以國事為重辱勉服於位其體朕素以祈佇卿之意所乞宜不允

賜張昇乞致仕第一劄子不允詔

勅北極之躔筦於神務二枋之府倚以老成矧文考之風咨顧冲人之初政引年遽去則體國之義微省牘將

從則遇賢之禮薄雖陳六不可之畫蓋有兩未安之懷
勉自嗇綏庶符委竚所乞宜不允

賜判許州張昇乞致仕第一劄子不允詔

勅夫君子之行已也要得進退之時故二帝之朝有合
慮之賢無去位之老朕初即天下思與忠碩之臣而共
治之豈卿欲退之時哉其近醫藥專精神以自扶持若
乃杜門聽命朕何望焉所乞宜不允

賜鎮海軍節度使同中書門下平章事富弼生

日進馬詔二道

勅朕肇臨大統欣矚邇僚紀慶誕之嘉辰推寵盼於舊式載披謝牘彌諒勤衷

勅卿比膺朝檢外領藩符極存闕之深思虔貢庭之舊式載循蓋節良積褒懷

賜鎮海軍節度使同中書門下平章事判河陽
富弼進壽聖節上壽金酒器并馬詔

勅春發歲華宵凝月朏載歷感樞之序首陳薦掌之儀

言念傾勤靡忘嘆矚

賜夏國主賀壽聖節進馬詔

詔夏國主方春首祚維月生明適臨載誕之辰申祝無疆之歷慶函爰上方貢是陳緬念忠勤舉深嘉獎

賜夏國主賀正旦進馬馳詔

詔夏國主淑律開年芳風被物世善守封之固歲膺頒朔之祥修時貢之是歸嚮邦風之有益載惟勤節良起嘆懷

賜判許州張昇進南郊慶成詩獎諭詔

勅朕乃者飭精於郊以見上帝秉德在位有來羣臣眷
言舊政之良適寄近符之守迹雖留滯莫陪盛禮之趨
義切揄揚遂啓永歌之作載惟忠至尤極褒稱

賜從靈駕皇親東平郡王允弼等茶藥詔

勅卿護神駕之遊宅鼎郊之兆執龍輶之素紼從玉帳
之容衣沉露起於山河寒暄薄於原下有懷哀瘁爰致
恩頒

賜夏國主令發遣熟戶仍不得侵踐地詔

詔夏國主朕修文德所以懷遠人之安戢威武所以廣
諸夏之福豈欲為邊生患與衆興勞今據逐路經畧司
奏自嘉祐七年春至今秋以來夏國人騎或脅畧近邊
熟戶或侵踐當界民疇或假以金錢購亡命之卒或誑
以官爵誘無圖之夫為日滋深為害未已朕新膺大統
奄宅中區既思輯藩臣之和又將杜邊事之漸按西平
之舊則參慶厯之再盟未肩祖父之忠煩忽朝廷之制

緬懷裔土久慕化風豈委任之失人致講陳之非計夫
享盛福者莫如躬德義蹈後艱者靡不繇僭狂勉循至
言庶保先約其前後招脅過熟戶並須盡底發遣過界
仍令後人不得信縱人騎侵踐漢地致射傷人命及潛
購下第舉人與逃背軍卒等所有逐次邊奏因依已具
別錄

賜皇長子穎王頊乞班在允初下不允詔

省所上表具悉孟軻亦云爵為天下之通貴漢家之制

王乃皇子之近封雖骨肉本無至恩然朝廷著之定位
矧予上嗣之愛方爾外傳之從趣駕既行而馳道未窮
鳴雞適旦而寢門已至自進疏於方社數推序於宗藩
當識先民之大方以傳西京之故事蓋位不同者禮異
名不正則事違豈君父之獨親亦臣子之明分往班天
秩思裨賢猷所乞宜不允故茲詔示想宜知悉

賜皇子穎王頊乞班在富弼允弼允良下不允

詔

省所上表事具悉夫廣封建者所以大京師之輔正班
秩者所以尊朝廷之儀豈有享高爵而處後陳不可緣
私恩而撓公法蓋親親者愛本於族貴貴者體近於君
宜畧擯章往祇定著所乞宜不允故茲詔示想宜知悉
賜皇伯允弼皇叔允良允初特免常朝五日一

赴起居詔

勅夫尊尊親親人道之極也有若伯父保有賢德以藩
屏於王家朕新承大統思廣骨肉之恩以風天下匪尊

遇之何以見愛乎其免常朝每五日一赴起居

賜皇后高氏答詔

勅皇后高氏朕以長至之序大旅於郊至音繹和精志
孚盡肆上儀之丕就繫內治之素勤清蹕初還慶函首
及載循謙豫良集嘆稱

賜判大名府賈昌朝乞辭陵不允詔

勅昌朝省所上表今者靈輿啓行虞祭有日伏望許臣
暫交割府事便路詣永昭陵奉辭梓宮却回本任陳乞

事具悉七月初靈輜將御三川之下寶劍空留眷言
同德之良實契先朝之遇愴懷恩於舊幄思灑奠於新
郊然以領一道之麾符控北方之襟帶正倚坐綏之策
莫循來赴之情所乞宜不允

賜宰臣韓琦免恩命不允手詔

省所上劄子陳避司空兼侍中事具悉先帝不以菲涼
使主宗廟而卿承顧命定大冊諸臣未有以先之也朕
方推恩天下而於一二股肱之臣蓋亦考尋故事而甄

序之卿乃過陳悵悞至於再三夫輔立兩朝而功不獲
報豈朕所以褒賢錄德之意哉且稽祥符之制則遷官
恐未為過比乾興之除則兼職猶不加厚卿何疑而固
辭今朕初臨大政而將使命反如汗丞相豈不為朝廷
惜哉所辭宜不允仍令貼麻依舊封魏國公付韓琦

賜韓琦乞退第二劄子不允詔

勅蓋聞二帝之時君臣相與始終輯大治享大榮以施
諸亡窮朕甚慕之日者先帝不以菲德使奉宗廟之祀

而丞相嘗與定大策矣今與朕共濟之可乎君與之戒
曰罔不能厥初惟其終卿其申念之往恭用治毋斁所
乞宜不允

賜韓琦乞退第三劄子不允詔

勅昔帝舜嗣位猶戒一日萬幾之難高宗宅憂以聽三
年冢宰之治顧予甫膺聖序夙夜敢遑實賴輔臣左右
以濟惟卿之計罔有弗交何嫌疑而上書欲遂巡而去
位且馮拯嘗受真宗之託然疾乃聽辭張昇亦承文考

之遺雖老不得謝矧卿賦有康寧之德未及風力之衰
與其退營便安之私孰若進敷美利之澤七頒詔諭豈
不予從所乞宜不允

賜樞密使文彥博免恩命不允手詔

省所累上劄子奏乞罷左僕射恩命事具悉朕賴祖宗
之靈獲保大業體天地之德遂澤多方而卿適擁天下
之樞與定禁中之冊逮猷告於列位蓋體循於舊彝罔
羣言之弗同敢高爵之是愛矧仁廟不忘乎河北之難

先朝嘗稱有王佐之才尚懼尊禮之未昭何徇謙冲之靡已且西雍節制之拜既以外更而文昌端揆之名益還前命理無可避寵實為宜所辭宜不允

賜樞密使文彥博免恩命第一劄子不允詔

勅卿於藩之行去國未幾方趣還於帥鉞俾進翼於神機何剡牘之遽來欲辭權而自遠矧羌褻起勾廉之水邊氓思短後之衣日珩勝謀宜蠲冲節所乞宜不允

賜文彥博免恩命第二劄子不允詔

勅王者量才而授官君子審能而當位故任重者被責
大德厚者蒙爵尊矧卿昔在先朝嘗居上宰方邊隅多
事既仗以旄鉞之行及左右虛賢又委以樞機之政且
功趨時者不可失名適分者不可辭式佇遄歸以符素
矚所乞宜不允

賜文彥博免兼侍中劄子不允詔

勅朕遇二府之意隆矣蓋左調陰陽右鎮四夷皆宰相
之任也今召用卿而猶恐恩禮之未稱乃欲上還納言

之官豈朕意哉往即乃服毋廢予之前訓所乞宜不允
賜起復冠軍大將軍左金吾衛上將軍員外置
同正員依前成德軍節度使同中書門下平章
事判河南府文彥博免恩命第一表不允詔

勅卿位履將相不幸有喪親之憂朕用故事以哭踊之
卒而復位於常乃創鉅之情執禮而不可奪朕亦遭家
不造不能行高宗諒陰之事顧已薄哉夫與國者忠之
至顯親者孝之大忍私徇義可不勉乎所乞宜不允

賜使相判亳州宋庠乞致仕不允詔

勅朕惕守基序歷日未深勤思俊賢輔已不逮載省披
於藩奏願退老於家傳矧先帝大臣德望光美淮南近
服民風樂閒至若沴雨乘秋良疇變野朕不能引咎而
塞異卿乃欲緣災而退身雖諒乃誠匪安予倚所乞宜
不允

賜觀文殿學士孫抃乞致仕不允詔

勅卿早事先朝嘗更二府道逾久而彌篤年未至而請

休雖懷絕俗之風豈厭遇賢之禮往綏多祉來告嘉猷
所乞宜不允

賜富弼免恩命第二劄子不允詔

勅先帝不以菲涼使臨士民之上且褒功錄德蓋朕之
先務也維卿曩以建嗣之冊上於先朝方朕踐祚之初
乃銜恤去位而恩弗與焉夫履股肱之任陳社稷之計
而功不獲報豈所以勸天下哉並遷之命其勉承之所
乞宜不允

賜判亳州富弼乞罷使相第一表不允詔

勅朕初臨丕基首選大吏方勞精而共務忽引疾以屢
辭去雖踰於歲年念不舍於朝夕適覽奏函之莛又將
使袞之還且重祿所以賦上賢樂羣所以優舊德宜收
曲慮終保高名所乞宜不允

賜山陵行事官屯田郎中郎潔等茶藥詔

勅汝祇護靈輿肇新神域眷夙宵之勤事均霜露之感
懷宜有寵頒以綏冲履

賜山陵使宰臣韓琦茶藥詔

勅卿神興即路總使先期陵土復宮庀司終事泣橋山之冠劍犯畢陌之埃塵宜被寵頒用資和嗇

賜大遼皇帝弔慰大使茶藥詔

勅某使傳兼途適寧郡舍慰函敦好靡後隣哀顧馳邊驛之長言涉暑威之熾特頒靈劑用輔冲襟

賜祭奠大行皇帝副使茶藥詔

勅卿介聯賓範嗣講隣和馳信節於星驂來奠樽於玉

几炎威勃滴行道逶迤均賜上奩紓勞近驛

賜大遼皇帝賀正旦大使茶藥詔

勅卿修和隣契會慶春元顧偃薄於寒威宜輔綏於靈
氣爰將嘉錫庸獎至釐

賜賀正旦副使茶藥詔

勅卿參馳使傳薦講隣歡屬冬籥之正嚴顧征途之多
勩宜申嘉惠用輔至和

賜大遼皇帝賀正旦大使茶藥詔

勅某嗣更歲歷祇達朝言將拭玉以展儀正蒙霜而在
道顧馳驅之靡止諒調適之難中有腴於頌唯和是嗇

賜契丹皇帝弔慰大使茶藥詔

勅某遘國鉅哀方遵喪節承邦永好遽置慰函溽暑御
辰修途勞轡宜蕃珍錫以輔至和

賜弔慰副使茶藥詔

勅卿與介使儀初聞隣恤受君言而夙駕修邦慰以如
期炎歊正煩行邁靡止宜推賜式往輔時休

賜契丹皇太后弔慰大使茶藥詔

勅某比遘國凶旋馳隣告申有經之弔禮及在疚之哀
懷炎御流空飛旃在道宜資調適且厚睠存

賜弔慰副使茶藥詔

勅卿肅參使選遐致隣音介信傳之遄征及櫝宮之永
慕暑威煩溽塞路阻長載惟衝冒之勤宜有綏調之助
賜契丹皇太后祭奠大行皇帝大使茶藥詔

勅某鍾釁上旻遏音四海夙講隣疆之契遽將禮賄之

歸暑氣鬱興征途長驚謁煩輔疾宜有寵頒

賜契丹皇帝賀壽聖節大使茶藥詔

勅某誕節紀春使華乘隰通隣函之永好勤塞路之遐
征申念夙勞宜膺寵賚

賜賀壽聖節副使茶藥詔

勅卿榮貳使華協通隣睦屬祁寒之晚候冒修陸以遙
征宜服寵頒用資和嗇

賜契丹皇太后賀壽聖節大使茶藥詔

勅卿誕祥紀節隣聘將儀遵使驛於長途彌征驂於近
堞芳芽靈劑式厚於頒

賜賀壽聖節副使茶藥詔

勅卿將靈寶之和趨誕祥之會歷塞亭之長道驚歲筦
之殘陰禮有常頒念申永好

賜契丹皇帝賀登寶位大使茶藥詔

勅卿選馳使節慶繼休期載勤夙駕之征言涉半塗之
候桐錄之種建谿之英並助遵調且紓行邁

賜賀登寶位副使茶藥詔

勅卿夙將信弊參駕封車屬膺皇厯之新來致寶隣之問金甌振響鱗隰飛華宜有寵頒用扶冲履

賜使相曹僧生日禮物詔四道

勅卿出元勲之緒推外戚之賢屬慶誕之初辰有寵頒之舊式茲為異數以助多祥

勅卿位冠英貂望尊戚苑屬誕彌之嘉序有慶賚之異儀茲寵近聯以綏多祉

勅卿望隆外戚位貫中台紀誕慶於嘉辰將賜儀於上
府以續勲門之祉以資燕席之華式是寵私益優賢舊
勅朕尊撫羣乂寵加近臣矧推外戚之賢實預中階之
列高門積厚季夏紀生爰將詔檢之頒用續私楹之慶
賜樞密使張昇生日禮物詔

勅五行之粹是生上賢萬事之幾屬在元老南訛紀序
六射協辰爰有寵頒以將禮遇

賜夏國主賀登寶位進方物詔

詔夏國主朕惕奉聖謀丕膺皇統眷守封於西土勤述職於中邦宜有匪頒式將倚遇

賜司農卿知滑州馬尋賀皇子加恩進絹詔

勅比以旌賢上嗣疏爵近封檻列土之飛章充大庭而備用有懷欽蓋良積褒嘉

賜外任臣寮馬尋等進賀壽聖節絹詔

勅卿茂服朝聯肅祇邦委屬元春之令序紀誕日之休符列上慶函旅陳珍貢載循忠鄉良集寵嘉

賜諸路賀封東陽郡王進絹詔

勅朕崇建藩屏保疆京師眷言守土之臣旅上充庭之貢勤誠所擲嘉矚良深

賜外任臣寮呂溱等進賀壽聖節絹詔

勅月朏迎年皇極感節睠肅膺於邦委能遠効於庭輸率守彌恭興言增嘆

賜太子賓客知相州趙良規賀封潁王進絹詔

勅朕丕宅皇猷茂封嫡藩眷分守於郡符遽旅陳於邦

貢永言欽嘆曷弭于懷

賜成德軍節度使同中書門下平章事判河南
府文彥博赴闕朝見後赴任詔

勅卿以咸德之良有同體之愛自遭家之大故已去位
之三年既從日月之除可復朝廷之事雖仍外寄且佇
來朝令朝見後赴任

賜資政殿學士知河中府孫沔免恩命第一表
不允詔

勅卿早事先朝嘗更二府材匪難而弗濟年未至而遽
休朕甫宅丕圖有懷夙艾特起林泉之逸就盼章組之
華儀形未親封奏來上夫圖功名者蓋賢人之事識卷
舒者亦君子之宜往勵壯猷尚欽寵遇所乞宜不允

賜孫沔免恩命第一劄子不允詔

勅朕疾世競名則嘉彼遺榮之士因時用武則思夫制
勝之臣卿被遇先朝嘗任大事歸休故里已蹈高風屬
興疆場之虞遂還官職之舊夫惟過執於撝節孰若進

圖於茂勲其免受書撫我西畧所乞宜不允

賜觀文殿學士知慶州孫沔免恩命不允詔

勅朕觀先帝時卿每有除命則逡巡固辭又年未及老而上還君事可謂有難進之風矣今羗人跳梁朕特起卿屬以疆垂之虞非若平日之可辭也夫退而敦厲風俗進而圖立事功不亦偉哉所乞宜不允

賜皇伯東平郡王判大宗正司允弼免行事允

詔

勅國家卜天正之吉修郊見之儀將命親賢之臣肆陪
裸薦之事粵予伯父以老自辭朕顧於骨肉之恩尚恐
弗至維是夙夜之祀豈不為勞宜遂便安以稱尊禮所
乞宜允

賜皇伯集慶軍節度使同中書門下平章事宗
諤乞罷赴中書禮上允詔

勅自昔公卿大夫各率其屬以聽於有司國朝宗室之
制雖位公卿而不領以事然受命之日猶一至府以班

見百寮維我伯父既位公相矣乃不敢以故事自處之失德尊而不忘其禮寵至而愈下其心朕雖拒之可乎宜依所乞

賜美人董氏免恩命迴授與父安允詔

勅美人董氏夫事君辭寵者德之嘉報親宗養者孝之至矧本處房闈來儀掖庭屬辭慶於穠華因進階於顯級遽騰累牘深露柔衷願均迺父之恩共美茲辰之遇實嬪闈之休範將史筦之良書載省退冲亦用嗟允所

乞宜允

賜樞密使富弼免恩命第一劄子不允詔

朕即位以來惟是一二共政之臣勤勞夙夜以乂於王家朕敢有爵賞之愛乎卿以惓惓自陳至於五六謂錄小勞不若報大恩鴻惟仁宗皇帝欲報之德昊天罔極皇太后子育朕身朕方以天下之養以承顏於朝夕矧敢曰養之至乎今既勉朕以事親之道乃拒君命而不受豈其言之盭邪夫命下而反猶反汗也朕初政而下

反汗之命何以視天下哉所乞宜不允

賜樞密使富弼乞外郡第一劄子不允詔

勅朕承九五之尊御億兆之衆日有萬幾之務咨於二
柄之臣而卿偶疾家居露章朝聽欲避繁機之委將圖
便郡之行且蹈直道者不可輕去就之分往綏冲履來
告嘉言所乞宜不允

賜富弼乞外郡第二劄子不允詔

勅卿舊德之良先帝所遺邁羣材而奮用更二府之倚

成比違嗇養之和旋被康寧之福方仄席以是念忽請
藩而自陳賜告於家況有漢庭之優令永弼乃后亦惟
周臣之一心勉輔粹神尚綏顯服所乞宜不允仍斷來
章

賜宰臣富弼乞外任不允手詔

省所上劄子願解機政乞假麾符事具悉夫願治之主
固欲擇士臯夔之倫有道之臣亦將致君唐虞之上故
揆策圖事聚精會神合若金石之堅舉無毫髮之間朕


緬循前聖登相舊人誠罔有不及禮罔有不至而輔政未幾引疾屢辭予有經理萬物之心而不得舒予有飭修百度之志而不得發退自念此將何望焉雖懷君子三去之高頗繆二人同心之利且奉藩於外亦已厭黽勉之勞然論道於中豈不開優游之望毋專冲守終仰丕成所乞宜不允仍斷來章如心氣未寧且輔近醫藥不須更求郡以體朕眷注之意付富弼

賜起復宰臣富弼赴闕詔

勅卿夫宰相者所以與朕調豫陰陽鎮撫四夷顧天下之務日亡不聽者觀漢唐之際最為盛平然秉政之臣未有致位終喪之事矧今勞思叢廊之上而圖治之不給哉卿遭艱以來乃累詔未起朕惟篤君臣者莫大乎義則可以斷恩顯父母者必揚其名則可以稱孝卿其抑餘哀迪大節以終惠子無窮之休所乞宜不允依累降詔書乘遞馬疾速發來赴闕故茲詔示想宜知悉

賜樞密使富弼赴闕詔

勅卿材德之粹名世而生昔在先朝實登上宰銜憂去
位日月既除未予冲人嗣膺大厯聿懷元老共濟厥圖
還冠樞臣左右同體已降制命除卿樞密使特進檢校
太師行禮部尚書同中書門下平章事令乘遞馬疾速
發來赴闕



欽定四庫全書

集部

華陽集卷二十七

詳校官庶吉士_臣李如筠

檢討_臣何思鈞覆勘

謄錄監生_臣馮克鞏

謄錄監生_臣董誠

謄錄監生_臣王人作

欽定四庫全書

華陽集卷二十二

宋 王珪 撰

制詞詔

賜武康軍節度使知相州李端愿赴闕詔

勅卿參華戚苑奉寄侯藩載惟問俗之勞得亡存闕之
念宜徃傳於迅召佇還對於嘉謀屬在睠懷尤深馳想
宜交割職分公事與以次官員權管勾訖乘遞馬疾速
發來赴闕

賜臺諫官詔

勅某等樞密本兵之府也在祖宗時固嘗得勲勞親信之武臣而參用之日者先帝用郭逵蓋有意乎此也今臺諫官爭言逵不宜在執政之地朕嘗熟復於懷以一言之譽進之以一言之毀退之豈朝廷篤於用人之意邪至引德宗之黜裳袞憲宗之貶韋執誼豈不傷先帝知人之明使朕亦蹶躒而靡安也夫言而不濶於情體諸朝廷之宜而易行朕何憚而不從毋為徒紛紛也其

審朕言毋忽故茲詔示想宜知悉

賜外任臣寮呂居簡等進賀壽聖節功德疏詔
勅氣婉開年慶臨誕序乃眷邦符之守有嚴佛事之修
披省之餘嘉媿何已

賜美人董氏免恩命不允詔

勅美人董氏朕即教化之原蓋治由近起推統紀之重
則寵靡內崇維爾法度有嫺言容靖順早與漢庭之選
嗣開沁水之祥况居念憂勤進無私諛宜陞華於服位

且旌淑於宮房望自衆嘉恩非獨侈何懷謙之厚竟抗牘以辭方彤篋之承宸已紫書之下省往儀爾列母拂予聞所乞宜不允

賜判大名府賈昌朝乞罷使相第一表不允詔勅夫外經皇邑均神輿於邦中北帶洪河極形勝於天下留朱門之別篋倚玉鉉之前良況民思惠愛之深敵識威聲之舊告謨列位寵以答功厲節當朝義無廢禮顧重守方之寄猶輕易鎮之名還總帥權趣祇廷渙所

乞宜不允

賜賈昌朝乞罷使相第二表不允詔

勅夫謀在廊廟中以仰於丕誠職於藩宣外以穆於至
化交為王室之倚參重臣隣之欽按舊府於北邊崇別
都之一會適委官符之守薦煩齋鉞之行顧威重足以
服戎心惠綏足以裕民力載稽夙望允契僉言既敷號
以旌勤迺繼章而露悃蓋懷經世之才者處難就佚存
許國之義者動思圖庸當厲壯猷徃祇定命所乞宜不

允

賜賈昌朝乞罷使相第三表不允詔

勅朕猥以眇躬新承聖緒雖日念艱難之大業猶未識
輔弼之舊臣矧北道當戎馬之衝別京主莞簪之重臨
機制勝既倚之勁謀美俗流風亦申夫茂績遽願還於
相紱且蘄解於邊符豈未遑體貌之儀將自饜官職之
事露章三至良用憮然所乞宜不允

賜賈昌朝乞罷使相第四表不允詔

勅夫狗大節者不謀其身膺大名者必澤乎世眷言舊德契我先朝入登三世之臣出長萬夫之政載清淨於邦畫布中和於民聲乃越月以來奉章數至且擁旌北道方資誓國之靈而還節上臺難議易藩之命詔音比下毋或重陳所乞宜不允

賜賈昌朝乞罷使相第五表不允詔

勅卿被知先朝更枋二府給符居守雅聞善績之凝賜節來朝屢告嘉言之益方就安於輔郡乃還上於將旌

雖高避寵之懷未究尊賢之體所乞宜不允

賜使相判大名府韓琦條畫河北利害詔

勅自北道休偃兵事垂七十載而人情恬於安佚武備弛於因循養兵雖多而未練畜馬雖衆而未精繕修城壘而未盡完固簡閱器械而未盡犀利加以隄防決壞溝洫湮廢賦斂不節徭役無時民力困於累年軍儲匱於列郡此使朕不得不以邊為憂也夫謀不必勝安有可恃之勢事不素具曷待非常之虞卿總制方陞舉精

策慮在興廢而補敝務經遠而適時至於軍政之弛張將吏之能否出入之險易守禦之利害皆可密為條畫以聞

賜判大名府韓琦為水災撫輯河北詔

勅大河之北歲比不登又有水溢地震之災方春東作民益不聊生攜老幼棄田廬日流徙於道朕甚閔之豈役煩斂重而吏莫之省邪將奸人乘此災變而動之也朕中夜以興為之慘怛不安前日徙鄉以鎮大名者非

有意於此乎其經制之方已聽便宜從事若有可以佐
吾民者宜帥意遠思為朕撫輯而賑全之母使浚民以
重民困也

賜守司徒兼侍中判相州韓琦赴闕召見後赴
任詔

勅卿嚮避政幾往綏邊瑣薦檻奏函之既願紆卿紱之
歸已徇素懷且優碩輔興念勲勞之舊靡勝閒燕之私
可赴闕朝見訖之任

賜判大名府韓琦便宜從事手詔

省所上劄子辭判大名府事具悉朕比以大河之北水患相仍又去年地震不已城壁室廬葺而復隳變孰甚焉朕憫然有封塲之虞深思得人以鎮撫一方卿舊政之臣維是國家休戚之均故前遣使者以諭屬卿之指庶幾莫或予違今乃以去鄉閭撓疾患為辭豈朕所望焉且抱大忠者固常戀於本朝緼閭畧者誠匪安於散地其勉精持神易轅而之藩母使朕終厪於北顧也已

除卿判大名府河北路安撫使仍聽便宜從事苟朝廷有可應副朕當力為主張今差入內東頭供奉官勾當御藥院李舜舉齋勅賜卿即宜祇受便發赴任以副朕意付韓琦

賜宰臣韓琦乞退第三表不允詔

勅夫士之砥名行蒙寵祿者豈徒致主唐虞之上亦欲廁身稷契之列故時至則遂行道行則勿休也今卿名蓋於四海功施於三朝乃曲徇自滿之戒繼陳欲去之

辭使朕朝念而皇皇夕思而耿耿也矧賜書之數下益上牘之靡回且天子之令惡於煩大臣之舉惡於輕朕言已乎其起安位所乞宜不允

賜鎮安武勝等軍節度使守司徒兼侍中判相州韓琦免恩命不允詔

勅朝廷之設名器所以待天下士之賢兩鎮節度使雖未嘗除非有所愛誠有以待之也今卿歷相三朝功烈休顯抗言引去朕慙然有不足於心推求恩禮惟恐遇

卿之薄也夫冠四輔之位於內領兩使之節於外顧其勢孰重孰輕哉尚何辭焉所辭宜不允

賜楚國大長公主等詔

勅楚國大長公主朕躬即崇丘祇見上帝乘一陽之孳物飭百執以錯儀適涓釐事之成遽有慶函之上申玩嘉意良深嘆懷

賜端明殿學士知大名府王拱辰免恩命不允
詔

勅朕承先帝遺業思與賢士大夫興治天下其於委遇
豈有內外之間乎大名主別京之鑰也以卿望重而名
美故以付之令加秩一等豈厭朕所以待之之意尚何
辭焉所乞宜不允

賜端明殿學士知定州王拱辰免恩命不允詔
勅夫全趙之總萬兵蓋其據戎馬之衝地學士之兼三
組豈不極文翰之高選以卿業由義府謀有將機既委
以中山之鎮又寵以戶卿之行庶俾任隆而恩稱望重

而勢立忽攬連牘願官近親雖美志之有昭莫舊文之
曾比宜欽剝屬姑畧冲撓所乞宜不允

賜知定州王拱辰乞再任西京迎奉靈駕不允
詔

勅大行不復鉅創攸同七月戒期三川在望忽觀需牘
願奉靈輿然以總連帥之權控強敵之境方賴守封之
畫難從易寄之行所乞宜不允

賜知大名府王拱辰乞暫赴闕朝覲不允詔

勅卿久去禁游薦更藩寄屬肇承於題序漸入展夫覲
儀睠全魏之山河主別京之筦籥方用資於鎮撫未及
對於清閒為北京久闕官所乞宜不允

賜端明殿學士知定州王拱辰乞移許州不允
詔

勅卿夙以瓌名階於撫任自違辭橐之從薦易邊符之
行流年變陰側席馳想眷中山之鉅屏控朔野之三關
擁一道之全師須萬里之沈畫為國重寄擇時美才宜

即于宣諒難圖佚所乞宜不允

賜翰林學士馮京已下進南郊慶成詩獎諭詔
勅乃者大旅於帝而神祇歡靡不右饗非秉德之彥夙
夜在祀之助乎及茲禮成又能發為聲詩以揚一時之
休願非甚盛德何足以稱之省披之餘嘉歎何已

賜宣徽南院使判延州郭遠免恩命不允詔

勅卿武足衛社謀能制邊時乃將臣之良實推戎落之
重適更臨於內鎮尚留倚於西陲宜體注懷毋煩沖避

所乞宜不允

賜判延州郭達乞京西一郡不允詔

卿守在要防居有重望恩信足以懷士卒威畧足以動
羗夷正仗折衝之圖遽陳猷劇之請矧敵情之難度方
邊脩之益修尚輯乃勞用安予倚所乞宜不允

賜宰臣富弼乞解機政不允手詔

省所上表為久病乞解機政事具悉朕承祖宗之烈履
士民之尊思茂經於治原故歷卜於賢輔以卿暴大名

於天下推全德於三朝屢遣使輶之行審從齋閣之訪
遂復來相庶幾仰成若作室而汝墉若濟川而汝楫朕
之所遇顧豈不隆何意歲時之未周而引疾患之為計
間或咨於丕務似有祕於嘉謀忽此露章乃欲避位大
失初終之望重為上下之疑豈朕臨政之不明涉道之
猶寡使卿外示弗彊之力內懷欲去之圖予心漠然中
夕永歎且賢者道欲行已要澤物於一時忠臣義不忘
君肯愛身於當國諒素存於耆慮勉起翼於皇機所乞

宜不允如氣體果未安且在告將嗇以佇痊平付富弼
賜皇后向氏答詔

勅皇后向氏比迪先彛有嚴大報乘初陽而錯事斬羣
福以裕民迨終嘉薦之虔適摠慶辭之美載循柔則長
集褒懷

賜判河陽富弼乞罷使相第一表不允詔

勅夫祿賦於賢則有勸功之道名當於位則無假器之
嫌卿推舊政之良膺兩朝之遇不見踰歲猶思武帳之

冠何疑上書欲歸丞相之紱矧聞風力之彌劬步趣之已平其安出處之常以厭中外之望所乞宜不允

賜富弼乞罷使相第二表不允詔

勅卿名德之重表儀羣倫代天熙工廠有成績間請自外亦既彌年神明懌和靡福不及來咨來度不我謂遐胡為弗寧願上相紱監微防損無乃過思圖維厥終尚迪朕志所乞宜不允

賜富弼乞罷使相第三表不允詔

勅朕猥膺大統尊見舊臣方謀治於朝廷益倚綏於方
嶽何意露章之及重形還節之文載畫一之歌終念鄴
侯之前畧起穆如之誦猶期山甫之遙歸其體注思更
要省慮所乞宜不允

賜富弼乞罷使相第四表不允詔

勅卿兼文武之資秉將相之任以疾去位既從逸於近
藩何疑上書每願還於重紱雖勤服於深識然終俟於
羣瞻化召南之正風尚煩於分守觀漢廷之故事多出

於前規其止重陳且需來顧所乞宜不允

賜富弼乞罷使相第五表不允詔

勅在昔先朝載謀舊德不圖離疾力謝政幾以至去都
薦更氣籥肆膺運歷之御莫遏德音之聞奚為底書數
欲上綬且徇情加惠本均左右之勞雖處厚辭隆何替
安危之倚孤節自守微文可蠲所乞宜不允

賜參知政事吳奎免恩命劄子不允詔

勅朕以眇身託於士民之上實賴左右忠賢之臣而共

濟之維卿秉節据正被遇三朝雖位在外藩之下而嘗受仁廟之遺進豫大政朕敢有後乎紱牘之來祈還定命徒嘉卿濟濟相推之意顧不得是從也所辭宜不允

賜龍圖閣直學士知河南府韓贄待罪特放詔勅夫上之化下也不可以戶曉故雖盛治之世不能使民不犯於有司今河南之民陷於重辟朕甚憫之傳不云乎刑期於無刑曷為引咎之來哉所待罪特放

欽定四庫全書

卷二十二

欽定四庫全書

華陽集卷二十三

宋 王珪 撰

制詞 詔

賜兵部員外郎知制誥知江寧府錢公輔待罪
特放詔

勅先王制禮以率恭作刑以明威所以使民遷善而革
暴也今愚民無知至有犯殺兄之罪者相繼而不止豈
朕禮教之不立刑罰之不明哉雖然亦在有司興行之

所待罪特放

賜翰林學士權知開封府馮京待罪特放詔

勅京師大衆之居也而化不能以日見乃無知之民悖于義理朕甚悼焉卿尹正天畿列章自咎省披之際有矜予懷所待罪特放

雨災許言時政闕失詔

蓋聞古之聖賢在位陰陽和風雨時日光星辰靜黎民阜蕃以底休平朕甚慕之朕猥以眇身託于王公之

上夙夜之思惟懼不能以承先帝鴻業而比年以來水
潦為沴乃八月庚寅大雨京師室廬墊傷被溺者衆大田
之稼害于有秋竊迹災變之來曾不虛發豈朕之不敏
于德而不明于政歟將天下刑獄滯寃賦繇煩苦民有
愁嘆亡聊之聲以干其順氣歟不然則何天戒之甚著
也今飭躬焦思欲銷復大異而未聞在位者之忠言進
祈自新厥路何繇焉應中外臣寮並許上實封言時政
闕失及當世之利病可以佐元元者悉心以陳毋有所

諱執政大臣皆朕之股肱其協德交修以輔朕之不逮
慈聖光獻太皇太后遺詔

吾受兩朝之託翊嗣聖之興十有七年安處房闈皇帝
天篤仁孝日滋睿神嘗咨務于禁中獲助勤於天下而
炎涼變序疾疹乘衰皇帝夜不解衣朝至忘食雖聖心
之備盡終天數之莫踰吾嘗觀性命之原達死生之際
生而饗慶壽之養沒則從昭陵之遊顧循初終夫復何
恨皇帝宜念宗廟之重無過哀傷更賴股肱之臣共為

寬釋成服之後三日外聽政服紀以日易月在京文武百官十三日而除諸司長官及近臣觀察使以上臨于宮庭其餘臨于宮門外諸道州府長吏已下三日釋服軍民不用縞素緣邊不得舉哀釋服之後勿禁作樂園陵制度務遵儉省勉從吾志勿事煩勞並依昭憲明德皇太后故事施行

封太祖皇帝後詔

昔我藝祖皇帝之興以天發之期兵未始一血及而卒

再造區夏其大謀盛烈被諸萬世而莫高焉朕奉承聖緒夙夜不敢康乃顧後之子孫寢微不顯而有司未嘗議封爵之文豈朕所以遵大統推親親之意哉且積厚者其流遠施大者其報豐宜令中書門下考太宗之籍以屬近而行尊者一人裂土地而王之使常從獻于郊廟世世勿復絕

賜宰臣魯公亮免恩命劄子不允詔

卿先帝大臣屬以輔朕躬帥百寮秉誼不急功其茂焉

始朕即位之初恩施于天下而丞相之秩未加典外固常慊然在心也今厚陵復土方親庶政所與朕共承社稷安元元獨丞相一人豈無恩禮以昭朕意乎夫勞大者予祿厚德盛者獲爵尊義不得以固辭也所辭宜不允故茲詔示想宜知悉

賜宰臣魯公亮生日禮物詔

勅卿夙賦閎謀對經元化屬仲陽之紀律載左戶之垂弧特豐鼎食之頒且厚台衡之遇自天錫祉與國同華

賜宣徽南院使判太原府歐陽修免恩命允詔
勅朕比顧太原之道實當二衝擇廊廟之舊臣委邊防
之大計而繼陳悃悃重託衰遲雖加勸諭之勤莫奪誠
辭之守宜聽安于便地庶增適于高懷予于老成惟恐
不至特依所乞仍仰繳納宣徽使勅就差知蔡州

賜河陽三城節度使兼侍中曾公亮乞免冊禮
允詔

天子臨軒拜三公其禮舊矣今朕以上公之秩加于元

臣方戒有司卜日而冊授之乃援疾固辭不能為朕引
綏廷下吁其禮何時而可復邪雖用勉從則匪朕心之
懌

賜樞密院直學士知鄧州王琪進和後院賞花
釣魚詩獎諭詔

勅朕萬幾之豫思燕羣臣暮春之和遂啟秘苑臨清流
而發詠惜餘萼以命觴人心樂胥天日延煦雖未足掩
魚藻之盛而固已追柏臺之娛卿蔚為邦英滯于郡守

聞華景之勝集念清徽之素遊遠託嘉辭進賡新唱矧
儒林之碩望有詩筆之舊名玩味之餘嘉歎何已

賜宣徽南院使判延州郭達赴闕茶藥詔

勅卿特守方隅貿淹時序屬羗人之背惠顧王旅之多
屯未清玉塞之氛聊問金城之畧適祇迅召爰及殊頒
賜侍衛親軍步軍副都指揮使郝質赴闕茶藥

詔

勅卿護塞夙勤提兵入衛初奉詔函之峻載嚴軍旆之

驅爰飭使璫往頒恩劑

賜保平軍節度使判鄆州曹佺赴闕茶藥詔

勅卿爰趨召節將次神畿維大旆之遵塗方高秋之凝
候宜推珍錫以輔冲綏

賜山陵管勾內臣尹日宣等茶藥詔

勅汝往奉陵園載勤夙夜顧協經於襄事宜均被予賜
常

賜侍衛親軍副都指揮使馬懷德赴闕茶藥詔

勅卿比持帥節外過邊衝還司禁旅之屯甫近神畿之舍特頒珍錫以寵素勤

賜奉安仁宗英宗御容禮儀使宰臣曾公亮茶

藥詔

勅卿即中洛之區安兩朝之像穀林朝望既驚王氣之長羽衛天回更想宸遊之在顧上儀之肆舉佇不日之來還適屬煩猷宜資輔畱

賜山陵禮儀使范鎮等茶藥詔

勅卿扈靈輜之舉宅神阜之安馳驅郊甸之勞偃薄風
霜之厲特推珍賜以輔冲綬

賜董戩加食邑實封誥勅示諭詔

勅董戩卿材推種豪代襲邦爵乃眷守方之勩特頒進
律之恩往奉歲章永綬外圉今賜卿加恩官誥勅牒到
可祇受

賜起復董戩官誥勅牒對衣等示諭詔

勅董戩卿材雄種落世守方隅眷恪奉于王翰宜嗣膺

于孝服特起苴麻之制更專鈇鉞之征徃厲忠圖永綏
休命已降制命除授卿冠軍大將軍右金吾衛大將軍
置同正員充保順節度押蕃等使今賜卿官誥勅牒并
對衣金帶銀器衣著具如別錄至可領也

賜契丹皇太后賀正旦大使茶藥詔

勅卿儀穆賓華聘交隣好念馳勞于寒日特賁賚于中
途俾助遵調益申瞻拊

賜賀正旦副使茶藥詔

勅卿選貳使材好通隣睦荐經塗于郡堞將會慶于歲儀匪出恩頒曷優禮遇

賜賀正旦大使茶藥詔

勅卿講和鄰契奉慶春元飭華御之遵途屬窮陰之凋歲匪將賜式曷示寵懷

賜賀正旦副使茶藥詔

勅卿榮介使華肅持聘禮冒寒威之率厲馳塞路之逶迤俾輔至和用將珍錫

賜賀正旦大使茶藥詔

勅卿講二國之歡會三朝之慶適冒風霜之勁載馳原隰之長宜命匪頒庶資保輔

賜賀正旦副使茶藥詔

勅卿敦講隣和輔承使指方寒威之正厲念長路之多勤宜有寵頒用資冲嗇

賜賀登寶位大使茶藥詔

勅某嗣邦之統早達信函繼世之歡復來聘節驅馳原

隰蒙犯風霜將賜之蕃畱神以裕

賜賀登寶位副使茶藥詔

勅某天垂丕命甫嗣皇圖國有善隣具將永好參服使
駢之寵遠馳征陸之勤賜出上都和生爽候

賜契丹皇帝賀正旦大使茶藥詔

勅卿寵銜君命歡固邦情展歲慶于端辰勤使華于修
睦式班良劑以輔至和

賜賀正旦大使茶藥詔

勅某窮陰適謝寶歷更新念使馭之夙征申隣函之永
睦風霜偃薄原隰馳驅宜將靈劑之頒庶適冲襟之輔
賜賀正旦副使茶藥詔

勅卿奉持隣好來會歲儀屬寒籥之氣嚴涉塞亭之道
邈特持嘉錫用示至懷

賜契丹皇帝祭奠大行皇帝大使茶藥詔

勅某禍延國變契重邦情有嚴使壯之馳來致奠觴之
祭道離煩暑心往神畿宜被殊頒用扶冲嗇

賜祭奠大行皇帝副使茶藥詔

勅卿參馳使傳祇會隣凶將陳歸賵之儀益起賓空之慕夙登長陸寢歷近郵宜均邦錫之良以助道腴之味
賜樞密副使呂公弼生日禮物詔二道

勅慶發高閎挺生碩輔氣秉朱亥之貴謀合丞疑之良
顧惟近司厥有頒式庶助祥于穀旦益經治于昌期
勅命發紫樞方倚勝謀之助寒生玉筩環臨誕序之祥
顧二府之峻聯有上臺之賜式庸將禮過庶績壽祺

賜參知政事王安石生日禮物詔

勅適正仲冬陽氣孳于物始乃生碩輔忠謨翼於政幾
頒內閣之賜常助高門之續祉宜爾昌熾屬予寵私

勅諸路節度并逐路總管已下遺留衣物詔

勅朕疾大漸惟幾恐不獲寤興今有遺惠以頒諸在外
臣爾其懋乃心于王家或亦慰朕之有知也

賜前兩府大臣兩省已上知州初冬衣襖詔五

道

勅中霜應辰列鎮分守持命乘輅之使爰將賜服之儀
茂宜素勞庸荷嘉寵今差某官賜卿初冬衣襖具如別
錄至可領也

勅卿早被朝掄荐均藩寄適戒隕霜之候持頒在笥之
衣無忘服休其勉恭事

勅卿德楸邦輝任勞藩劇方屬迎寒之候宜遵賜服之
常式厚眷恩用均安燠

勅卿去國馳思臨蕃勞慮荐履嚴凝之氣首均安吉之

衣聊卒歲陰用遵邦式

勅流景凋歲寒風動辰眷擁節於帥垣特頒衣于御府
維其安煥茲謂寵私

賜龍圖閣學士知池州王贇進方物詔

勅卿邦英之望朝寄是膺謹職守于藩隅達風宜于御
府嘉省于再予懷靡忘

賜皇伯祖承顯加食邑詔

朕惇宗盛禮祇適先猷茂對三靈駿奔億醜臣工顯相

后帝居歆嘉與親賢共膺戩穀皇伯祖昭化軍節度使
使持節金州諸軍事金州刺史兼御史大夫上柱國康
國公食邑五千八百戶食實封一千八百戶承顯治躬
齋栗養志粹和挺宗室之令儀藹公侯之淑問地隆磐
石任重藩垣春秋寢高學問不倦被服儒素蘊河間之
雅材琢磨箴規蹈衛武之美德助我盛祀協于多儀是
用進功伐之名益倍敦土田之賦乃加真食并示徽恩
於戲懷德維寧昔王之明訓為善最樂前哲之嘉猷勉

思高滿之危勿忘臨履之戒可特授依前檢校工部尚書使持節金州諸軍事金州刺史兼御史大夫康國公充昭化節度金州管內觀察處置等使加食邑七百戶食實封三百戶賜推誠保順功臣散官勲如故

賜夏國主歷日詔

交趾郡王
李曰尊同

詔夏國主王者握樞凝命推歷授時以考陰陽之端以明政教之始矚遐綏于藩土嘉夙奉于王正適履上辰更頒密度今賜治平二年歷日一卷至可領也

賜外任臣寮歷日詔二道

勅四氣更端三朝首序顧惕承于邦統爰恭授于人時
列土尊王上春始事宜膺班朔之命益楮勸民之方今
特賜卿治平二年歷日一卷至可領也

勅朕順稽天紀節授民常推紫緯之經文起清臺之密
歷以正昏明之度以宜發斂之期適及時頒共熙邦務
今賜卿熙寧四年歷日一卷至可領也

欽定四庫全書

華陽集卷二十四

宋 王珪 撰

制詞 勅書

賜定遠將軍張智常獲儂智高母弟獎諭勅書
勅某夙以勇槩表于衆人常施逐寇之勞兼篤嚮風之
志邊臣列效良集嘆嘉

賜皇姪叔放進南郊慶成頌獎諭勅書

勅某汝席慶皇家游心藝圃陪嚴禋之薦玉觀靈貺之

昭廷發為辭藻之工具贊聲明之度省披之際褒歎不忘

賜集賢校理馮浩等進南郊慶成詩獎諭勅書
勅某朕回歲習之祥躬郊見之禮維時秉文之彥莫匪
相祀之誠遽鋪載于聲詩能發揮于祀典以昭甚盛之
舉以示無窮之傳將順之深嘉媿曷已

賜昭德軍三軍將吏僧道百姓等除曹佾為本
鎮節度使示諭勅書

勅朕以曹佺地處戚藩位聯台鼎適紹休于邦祚爰更
寵于節旄載惟昭德之封實均全晉之襲肇有定命良
慰輿懷今特授曹佺檢校太尉依前同中書門下平章
事充景靈宮使行潞州大都督府長史充昭德軍節度
潞州管內觀察處置等使加食邑七百戶食實封三百
戶散官勲封如故

賜鎮寧軍三軍將吏僧道百姓等除曹佺為本
鎮節度使示諭勅書

勅朕以曹侑緒出元勲地聯懿戚顧宜勞于外間命徙
節于鉅封眷彼樂郊居有雅俗適登良翰宜慰遐瞻今
特授光祿大夫依前檢校司徒使持節澶州諸軍事行
澶州刺史兼御史大夫充宣徽北院使鎮寧軍節度澶
州管内觀察處置河堤等使加食邑七百戶食實封三
百戶勲封如故

賜武康軍將吏僧道百姓等除李端愿為本鎮
節度使示諭勅書

勅朕以李端愿襲重侯之序惟外戚之英比頒綽以告
廷遂擁旄而作鎮瞻言封壤之奧固有士民之蕃久被
化風諒均輿慰今特授李端愿依前檢校刑部尚書使
持節洋州諸軍事洋州刺史兼御史大夫充武康軍節
度洋州管内觀察處置等使知相州諸軍事同郡牧兼
管内勸農使加食邑七百戶食實封二百戶散官勲封
如故

賜知府州折繼祖進御馬勅書

勅汝素守方隅見推材武忽馳章于軍府爰驚駿于天
閑省閱之餘嘉歎不已所進馬已估到價錢一百九十
貫文省已交付差來人其差來人某與盤纏錢一十貫
文至可領也

賜知府州折繼祖進御馬勅書

汝保有世忠以扞邊場惕修邦貢驚駿上閑申念勤誠
靡忘褒矚

皇帝請契丹皇帝達皇太后正旦禮物書

正月一日兄大宋皇帝致書于弟大契丹聖文神武睿
孝皇帝闕下歲籥更端物華蕃始想極親闡之奉舉迎
邦祉之休歡篤善隣禮申常聘庶因晨夕為道誠悃今
差某官充皇太后正旦國信使副有少禮物具諸別幅
專奉書披述不宣謹白

皇帝賀契丹皇太后正旦書

正月一日姪大宋皇帝謹致書于孀大契丹慈懿仁和
文惠純孝廣愛宗天皇太后闕下氣更年堯物動春華

使駟于行具將隣好壽觴之薦益介時休祝想所深諭
言曷既今差某官充正旦國信使副有少禮物具諸別
幅專奉書陳賀不宣謹白

皇帝賀契丹皇帝正旦書二道

正月一日兄大宋皇帝致書于弟大契丹聖文神武睿
孝皇帝闕下寒威收節淑氣闔辰想履德之多勤宜薦
祥之有裕爰馳使傳聿致邦儀肇慶春元永孚隣好今
差某官充正旦國信使副有少禮物具諸別幅專奉書

陳賀不宣白

正月一日兄大宋皇帝致書于弟大契丹聖文神武睿
孝皇帝闕下天令發春年芳動陸息民之好方交篤于
鄰情履日之元諒蕃應于時祉爰馳使傳遙達慶函今
差某官充正旦國信使副有少禮物具諸別幅專奉書
陳賀不宣白

賜陝西諸州軍官吏將校僧道耆老百姓等遣
韓絳往彼宣撫勅書

朕以關陝以西城鎮相望老弱罷于轉餉卒吏淹于戍屯時命輔臣往宣朝指究方隅之民隱飭邊計於秋防凡在撫循並申眷相今特遣尚書吏部侍郎參知政事韓絳往彼宣撫故茲撫諭想宜知悉

賜保平軍三軍將吏僧道百姓等除賈昌朝為本鎮節度使示諭救書

勅保平軍三軍將吏僧道百姓等朕以賈昌朝舊儀宰路外歷帥垣適班紵于治廷存揚麾于鉅鎮乃睠樂郊

之俗久陶寧世之風間拜耆英想符輿望今特授昌朝
依前尚書右僕射檢校太史兼侍中充保平軍節度陝州
管内觀察處置等使陝州大都督府長史仍改賜推誠
保德宗仁守正忠亮佐運翊戴功臣散官勲封如故仍
放辭謝故示茲諭想宜知悉

回契丹賀乾元節書

四月一日兄大宋皇帝致書于弟大契丹聖文神武睿
孝皇帝闕下誕符表慶環臨夏籥之初聘節修歡垂祝

邦圖之懋味書詞之載縟閱禮幣之維豐感鏤所深諭
言非盡今某官等迴專奉書陳謝不宣白

回契丹達皇太后賀乾元節謝書

四月一日兄大宋皇帝致書于弟大契丹聖文神武睿
孝皇帝闕下初炎履候載誕膺期嗣修隣好之勤曲導
慈音之貺祥延邦厯聘厚物儀滋用感藏具因敷達今
某官等迴專奉書陳謝不宣白

賜于闐國郭林和罕王進胡錦并玉等勅書

省所差人進奉具悉卿介居西裔邈去中朝夙馳慕于
化風遽入輸于邦貢名昭徃牒義動殊方申念虔誠靡
忘嘉獎其所進物共估計到錢若干今迴賜某物兼別
賜卿國信物等具如別錄并交付差來大使婁薩袞等
至可領也

賜于闐國宰相婁伊固進胡錦并玉等勅書

勅于闐國宰相羅野屋省所差人進奉具悉汝馳名遐
裔慕化中區因信介之爰臻列貢函而來上有懷祇順

良集褒嘉今迴賜汝錢物若干至可領也

賜保靜軍三軍將吏僧道百姓等除皇兄宗諤
為本鎮節度使示諭勅書

勅朕以宗諤席祖宗之休篤兄弟之愛眷言淮服之奧
適建威旄之雄按士民之素蕃陶風化之甚美聞褒近
屬想慰遐心今特授宗諤依前檢校右散騎常侍使持
節宿州諸軍事宿州刺史兼御史大夫虢國公充保靜
軍節度宿州管内觀察處置河堤等使加食邑七百戶

食實封二百戶散官勲封如故

皇帝回契丹皇太后賀壽聖節書

姪大宋皇帝謹致書于嬪大契丹慈懿仁和文惠純孝
廣愛宗天皇太后闕下春和布律爰紀于誕期隣聘飛
輶荐申于慶祝既玩書辭之縟兼承信幣之豐欣感所
深諭言非既今某官等迴專奉書陳謝不宣謹白

皇帝回契丹皇帝賀壽聖節書

正月一日兄大宋皇帝致書于弟大契丹聖文神武睿

孝皇帝闕下春陽始布月朏初華紀誕節之嘉祥申寶
隣之永好特紆使傳爰致慶儀載味勤辭具深感素今
某官等迴專奉書陳謝不宣白

賜鎮海軍三軍將吏僧道百姓等除富弼為本
鎮節度使示諭勅書

勅朕以富弼昔在先朝嘗居上宰肆纂承于丕祚復登
冠于幾廷適蘄藩翰之行遂寵節旄之拜已祗成命諒
慰輿情今特授富弼依前檢校太師同中書門下平章

事使持節青州諸軍行青州刺史充鎮海軍節度青州
管內觀察處置等使判河陽軍州事兼管內河堤勸農
使加食邑一千戶食實封四百戶仍賜推誠保德崇仁
忠亮翊戴功臣散官勲封如故

賜西蕃河州刺史密章勅書

勅密章省所進奉并陳乞事具悉汝早承邦爵善守世
封內罄勤王之心間修任土之貢載嘉忠嚮宜有寵頒
今賜汝某物等具如別錄至可領也

賜靜海軍節度使同中書門下平章事安南都護交趾郡王李日尊明堂加恩告勅勅書

勅交趾郡王日尊朕考古之意乘秋之斂涓成宗饗昭輯上儀羣心大和不應屢下乃眷南顧厥勤內輸能纂世封荐啟王土肆于竣祀樂爾蒙休徃膺寵章益懋素守今差使臣賫卿加恩官告勅牒付廣南轉運司令于界首就賜到可祇受兼賜卿國信物等具如別錄至可領也

賜李日尊轉官告勅勅書

勅交趾郡王日尊朕適祇先訓登纘丕圖享國之安繫
于成業頌常之始渙以至恩眷爾保疆勤夫述職壽訓
外圉敷命大廷勉服世忠永綏邦寵今差使臣賁卿轉
官勅牒官告付廣南轉運司令于界首就賜到可祇受
兼賜卿國信物等具如別錄至可領也

賜李日尊進象勅書

勅某省所上表差人進奉具悉卿保有南裔列為外藩

屬疆事之就寧馳奏函而申款遐修方貢存篤世忠載
諒傾輸靡忘嘆獎

賜李日尊進金帛犀象勅書

勅某朕紹膺丕命奄宅多方睠世守于南陬能首虔于
內貢載覽剡封之至有嘉述職之勤宜被寵頒且昭厚
遇

賜靜海軍節度使同中書門下平章事安南都
護南平王李日尊歷日勅書

勅南平王日尊朕稽古凝猷揆天作厯凡舟車之所泊
皆正朔之所加適更歲令之端恭正人時之授勉經民
務用迪邦彛今賜熙寧四年厯日一卷至可領也

賜溪口彭仕義賀登寶位進方物勅書

勅彭仕義省所進奉具悉朕駿膺天命欽紹邦圖眷惟
谿落之豪咸上風宜之貢載循忠嚮良用寵嘉

賜彭仕義賀冬進方物勅書

勅某早以材豪長于陬落能篤邦風之慕式修歲貢之

常申念傾勤靡忘褒嘆

賜知龍州彭師贊進方物勅書

勅汝生于遐裔陶以太和荐行朝寵之華益大世封之
守爰輸方物以謹邦彛載諒爾勤有嘉予嘆

賜溪洞楊光潛進方物勅書

勅汝遐居夷徼善長衆豪既率境以嚮風爰因時而述
貢載惟祇順良積褒嘉

賜諸路蕃部溪洞初冬時服勅書四道

勅某善守世封紹修邦貢屬迎寒之初候稽頌服之舊
章式示寵休用嘉忠嚮

勅某汝撫封雖遐述職不懈存厯瑾扉之候往頒在筭
之衣思燠是均忠勤更篤

勅某汝夙表種豪荐綏世守方履凝嚴之序載均安燠
之衣其篤順成庸欽嘉矚

勅某汝夙以材能長于區落方履初寒之序式頒載燠
之衣徃厲素誠用祇嘉寵

賜大渡河南印部川山前山後百蠻首領苴尅
賀大登寶位進方物勅書

勅某地控遐陬心馳上國屬肇膺于邦統特致貢于物
宣言念傾勤靡忘嘆矚已降宣命下成都府路轉運司
指揮黎州依例迴賜汝集物若干至可領也

皇帝賀大遼皇帝正旦書

正月一日姪大宋皇帝謹致書于叔大遼聖文神武全
功大畧聰仁睿孝天祐皇帝闕下物華寶始天令更端

緬惟順履之修益侈純休之受載馳使傳交繹鄰歡詠
祝之深諭言曷究今差某官充正旦國信使副有少禮
物具諸別幅專奉書陳賀不宣謹白

欽定四庫全書

華陽集卷二十五

宋 王珪 撰

制詞 勅書

賜集慶軍三軍將吏僧道百姓等除皇伯宗諤
為本鎮節度使示諭勅書

勅朕以宗諤緒本皇支望有賢德懋建師節以藩王家
顧彼上疆之饒陶于風化之美諒聞嘉命彌慰輿情今
特授宗諤光祿大夫檢校尚書左僕射同中書門下平

章事使持節亳州諸軍事亳州刺史虢國公充集慶軍節度亳州管內觀察處置河堤等使加食邑七百戶食實封三百戶勲封如故

賜武勝軍三軍將吏僧道百姓等除皇弟頤為本鎮節度使示諭勅書

勅朕以顧皇屬之英先帝所愛爰暨纘承之始茂稽封建之文錫之大邦屏我王室既協朝僉之穆想符民望之愉今特授顧光祿大夫依前檢校太尉同中書門下

平章事使持節鄧州諸軍事鄧州刺史克武勝軍節度
鄧州管内觀察處置等使進封樂安郡王加食邑七百
戶食實封四百戶勲封如故

賜安武軍三軍將吏僧道百姓等除郝質為本
鎮節度使示諭敕書

勅朕以郝質秉將鉞之雄總禁屯之重屬受圖於帝極
更拜節于師壇瞻彼樂郊居有雅俗適頒廷號諒副民
懷今特授郝質檢校尚書左僕射使持節冀州諸軍事

冀州刺史兼御史大夫充殿前都指揮使安武軍節度
冀州管内觀察處置等使加上柱國食邑七百戶食實
封三百戶功臣散官勲封如故

賜諸路文武官吏等初冬衣襖勅書四道

勅某寒律應期良裘登御興念宿官之勲即頒在笥之
華安煥是資眷勤兼至今差某官某賜汝等初冬衣襖
具如別錄至可領也故茲示諭想宜知悉

勅某愛景流空寒威應律念飭躬于邦事推賜服於朝

彛眷起宸思恩回天燠

勅某流景易遷寒風率至緬念從公之勩宜推賜服之
常往被恩華益思忠厲

勅某寒風厲物愛景臨郊有懷從事之勤爰舉賜衣之
式其思恭慎以服恩華

賜諸路諸軍員寮等初冬衣襖勅書五道

勅某州屯駐泊就糧本城諸軍員寮等歲律乘陰邊隅
勞戍念訓師之是力宜頒服之以時益堅忠誠用稱恩

典

勅氣應寒簫禮登善裘念訓長于軍和實勤勞于戍守
並均安煥用厚綏存

勅嚴氣迎郊淒風干物申念戎和之長並推邦禦之良
賜服均溫勗躬念報

勅城隅分守冬律肇寒念夙長于戎和宜即頒於歲具
勉思忠蓋祇答寵私

勅服在師屯捍我城障適戒初寒之序宜頒載襖之衣

益堅忠勞庸答恩遇

賜奉安御容都知押班并內臣等茶藥勅書

勅汝肅奉晬儀往安珍宇甫宅衣冠之御固多夙夜之勞宜有寵頒用將眷禮

賜知辰州實舜卿進謝恩馬勅書

勅實舜卿省所進奉謝恩具悉卿素推勇槩屢撫邊衝適進董於戎昭當茂均于邦給翊章宸幄驚駭天閑載省傾勤弗忘嘉尚

賜定州路副都部署李珣進端午馬勅書

勅汝比膺邦寄外領兵符適臨邊瑣之初遽有天閑之
貢眷言祇順良用嘆嘉

皇帝謹賀大遼皇太后正旦書

正月一日姪孫大宋皇帝致書于叔祖母大遼慈懿仁
和文惠純孝顯聖昭德廣愛宗天皇后闕下天令更
端物心華始惟茂敦于柔度固丕介于純釐矧修鄰好
之長用致歲儀之慶茲為遙頌未易勝陳今差某官充

正旦國信使副有少禮物具諸別幅專奉書陳賀不宣
謹白

賜商州刺史解旦進馬勅書

勅汝參總戎昭會祇祿事首孚神惠并暨私庭述修貢
儀馳上慶牘恪恭滋至嘆惋良多

賜解州刺史劉德進馬勅書

勅內提禁旅出總藩兵方按律于戎和遽飛函於邦貢
載惟祇順良用嘆嘉

賜大理寺審刑院官吏等斷絕獎諭勅書八道
勅某昔天下之網嘗密矣然奸宄之不勝豈法令者非
致治之具邪朕德惠未孚至民多辟敢不惟刑之憂汝
等識法詳平決亡留獄興言嘉嘆靡忘于中

勅某在昔至治之世法施而民不犯今天下具獄之上
歲不可勝計何其化薄而罹罪者蕃爾等蔽斷詳明罔
不適刑之中朕方哀念纍繫之人乃克無重輕隨決章
達予聽嘉嘆以深

勅某朕傷時俗之薄仁愛德政不能以一化也故刑者
將以靖民然而罰不勝罪而日愈滋矣朕以天下斷獄
當論廷尉者靡不親閱之一歲之讞至于屢空非爾奉
職之效歟興言褒嘆豈忘于懷

勅某夫法者治之正所以禁暴而衛善人朕閱律令煩
多吏或巧詆以羅元元之無辜故命廷尉之官上下參
讞之庶幾平停天下之文今重輕隨決而靡不服厭人
心豈不近五聽三宥之意哉書云惟良折獄罔非在中

予惟汝嘉之

勅某古者畫衣冠而民不犯朕甚慕之厥後民日益薄而法令之不可止也雖然使刑不濫而民心得其庶矣夫今天下斷獄不可勝數而上于廷尉者隨即決之非明辨簡通則未易臻此也嘆賞之意夢寐以之

勅某朕惟獄重事也天下之繫所不能決者皆得奏而讞之而廷尉之報日以叢矣汝持法詳平乃不留獄歲數來上朕用嘉之

勅某朕閱天下之罹罪者衆凡獄當讞者皆聽上廷尉而一歲之讞至于屢空非爾持法詳明之效歟夫吏治辦而不見褒何以其盡心焉

勅某朕惟自昔之用刑必得之於簡而失之于煩蓋簡則主於恕煩則使民無所措手足此先王所以至慎也汝等專法刑憲而詳明區處皆適其中能使法之必行而不至于煩非為職事之修乎嘉獎之意不忘于懷

賜秘書丞館閣校勘陳繹進擬御試賦獎諭勅

書

勅某夫天地人之極至蘊而莫窺也誠非王者睿明神
知則莫能兼覽而參化之朕比措文創題以臨試天下
承學之士庶觀其所陳卿才雋過人退而作賦欲朕傳
五事以通三才以要諸治亂之歸夫豈特綴文之工歟
省披之際以嘆以嘉

賜廣南東路轉運使董詢捉殺海賊獎諭勅書
勅某朕德不能綏遠至盜起海隅害于行旅歲久未平

汝以使者之任能督部吏用兵格鬪斬首捕虜厥功著焉除惡輔民嘉乃之舉

賜梓州路轉運使韓琦等減罷重難差役獎諭勅書

勅某朕患今力役之不平數下諸道監司推其利害之原將更制以便民而久莫有應吾詔者汝獨能盡心帥職凡蠲去積弊蓋十七八執政為朕言其法可推行天下朕維爾忠幹之實不有褒賞曷為勤吏事之勸

賜權提點廣南西路刑獄公事李師中等興水

利獎諭勅書

勅師中等昔秦命御史監郡史錄鑿柱之靈渠漢益浚之以通漕嶺西然其道狹而流壅其後卒以堙廢爾奉職于外究興利源鑄石疏流役不留月舟航之濟自公及私都水上功不忘嘉嘆

賜知深州晁仲約為野蠶成繭獎諭勅書

勅仲約饒陽之區蒙澤豐楙野蠶成繭布于桑郊斷數

機中貢之王府羣化所感以膺厥祥歸美於君事嘉前
史興言嘆尚曷維其忘

賜知台州李頎救濟水災獎諭勅書

勅某臨海之邦水忽暴溢民之被害朕甚憫焉汝奉寄
於州而能繕完城壘堤防之修以安集於吾民外臺列
功繼達予聽顧不爾勞之嘉乎

賜權知海州章誠獲軍賊獎諭勅書

勅某日者徼巡之官失于馭下致起畔卒歛驚海隅汝

職守隣疆力當賊銳募徒應猝擒捕有方外臺列功久而未省再覽來牘良深汝嘉

賜五臺山十寺僧正等進功德疏獎諭勅書四道

勅五臺山十寺僧正某等省所進新正功德疏事具悉
五峙之峯金繩滿界度門之衆口誦真文歲元首和歸
祝皇厯亮爾恭嚮有嘉予懷今賜某等紫僧衣一對絹
二十疋故茲獎諭想宜知悉

勅雁門之勝山峙五峰寶刹連雲應佛真迹諦文滿義
日導迷途歲集善因不忘嘉嚮

勅爾時佛言大慧諸識有生住滅之種夫性生住滅之
種非佛了性去來皆是因緣則諸衆生盡無明見不可
嚮福故佛從種種地方來作慧境界隨所應度隨所應
見而為普見不可思議今師往五臺十寺寶佛昔住之
處能率諸大弟子咸起信心修如是行復使衆生知佛
之去來應如是法作無量功德善哉善哉

勅名峰列峙寶剎相望因獻歲之導和復誕辰之紀慶
歸虔大覺徧譯真文載念勤修靡忘嘉歎

賜河陽三軍將吏僧道百姓等除曾公亮為本
鎮節度使示諭勅書

勅朕以曾公亮先帝大臣三朝舊宰重抑老臣之請特
申幾務之勞方移旆于上都且分旄於巨鎮眷言士吏
以暨軍民聞孚號之已行諒輿情之胥說今特授亮依
前司空檢校太師侍中持節孟州諸軍事行孟州刺史

充河陽三城節度孟州管內觀察處置河堤等處使集
禧觀使仍改賜推誠保德崇仁守正協恭忠亮翊戴功
臣食邑食實封散官勲封如故仍五日一奉朝請

回大遼賀同天節書

四月一日姪大宋皇帝謹致書于叔大遼聖文神武全
功大畧聰仁睿孝天祐皇帝闕下執衡施令載紀于誕
祥奕世修歡具敦于隣契遐馳使傳曲遺慶儀載味勤
辭徒深感素令某官等迴專奉書陳謝不宣謹白

回大遼皇太后賀同天節書

四月一日姪孫大宋皇帝謹致書于叔祖母大遼慈懿
仁和文惠純孝顯聖昭德廣愛宗天皇太后闕下候屬
初夏時宣盛陽特紆使傳之華風致誕辰之慶情敦永
睦物過常豐其在榮藏曷殫敷喻今某官等迴專奉書
陳謝不宣謹白